

YANGI O‘ZBEKISTON

Ijtimoiy-siyosiy gazeta

№ 215 (1004), 2023-yil 17-oktabr, seshanba



www.yuz.uz



yuz.uznews



yuz_official



yuz.uz_news

JAHON IQTISODIYOTINING ENG ISTIQBOLLI SOHASI —
TURIZMNI RIVOJLANTIRISH BO‘YICHA MUHIM TASHABBUSLAR ILGARI SURILDI

O‘zbekiston Respublikasi Prezidenti Shavkat Mirziyoyev 16-oktabr kuni Butunjahon turizm tashkiloti (UNWTO) Bosh Assambleyasining 25-sessiyasi ochilish marosimida ishtirok etish uchun Samarqandga tashrif buyurdi.



Davlatimiz rahbari dastlab Imom Buxoriy maqbarasini ziyorat qildi. Qur‘on tilovat etilib, duo o‘qildi.

Majmua hozirgi kunda yangidan barpo etilmoqda. Bu yerdagi qurilish-pardozlash ishlari ko‘zdan kechirildi.

O‘zbekiston Respublikasi Prezidenti Shavkat Mirziyoyev “Buyuk ipak yo‘li” xalqaro turizm majmuasi kongress markazida Butunjahon turizm tashkiloti (UNWTO) bosh kotibi Zurab Pololikashvili bilan uchrashuvda O‘zbekiston turizm salohiyatini oshirish bo‘yicha BMTning

ixtisoslashtirilgan instituti bilan ko‘p qirrali hamkorlikni yanada kengaytirish masalalari ko‘rib chiqildi.

Turizm tarmog‘ini isloh qilishda O‘zbekistonning strategik hamkoriga aylangan UNWTO bilan birgalikda misli ko‘rilmagan yuksak darajaga

erishilgan katta mamnuniyat bilan qayd etildi.

“Ipak yo‘li” brendini keng yoyish, jumladan, turizm infratuzilmasini rivojlantirish, mamlakatimizga turizm yo‘nalishlarini ommalashtirish, malakali kadrlar tayyorlashga qaratilgan dastur

va loyihalarni amalga oshirish borasidagi qo‘shma sa‘y-harakatlar yuqori baholandi.

Mamlakatimizda UNWTO Bosh Assambleyasining yubiley sessiyasi o‘tkazilishi, uning doirasida Samarqand shahrida Xalqaro turizm akademiyasi

va “Ipak yo‘li” tematik ofisining ochilishi hamkorlikning muhim amaliy natijalari bo‘ldi.

Davomi 2-betda

O‘zbekiston Respublikasi Prezidenti Matbuot xizmati suratlari.

O‘ZBEKISTON RESPUBLIKASI PREZIDENTI SHAVKAT MIRZIYOYEVNING
BUTUNJAHON TURIZM TASHKILOTI BOSH ASSAMBLEYASI 25-SESSIASIDAGI NUTQI

Hurmatli Bosh kotib janoblari!
Hurmatli delegatsiya rahbarlari!
Xonimlar va janoblari!

Butunjahon turizm tashkiloti Bosh Assambleyasi 25-sessiyasining ochilish marosimida barchangizni samimiy qutlashdan baxtiyorman.

Tashkilotimizning yubiley yig‘ilishi Buyuk ipak yo‘lining durdonasi, Yangi O‘zbekistonning yirik sayyohlik maskani bo‘lgan ushbu qadimiy shaharda o‘tkazilayotgani chuqur ramziy ma‘noga ega.

Jahon sivilizatsiyalari chorrahasida joylashgan bu betakror shahar asrlar mobaynida Sharq va G‘arbni o‘zaro bog‘laydigan, savdo, ilm-fan va madaniyatning chinakam markazi bo‘lib kelgan. Mashhur Rimga tengdosh bo‘lgan ushbu boqiy zamin ulkan saltanatlar poytaxti, ulug‘ alloma va mutafakkirlar, aziz avliyo

zotlar kamol topgan yurt sifatida bizga hamisha g‘urur bag‘ishlaydi.

“Yer yuzining sayqali” deya shuhrat qozongan, Sharqning ikki buyuk Uyg‘onish davri rivojiga ulkan hissa qo‘shgan Samarqand bugungi kunda jahonning zamonaviy sayyohlik markazlaridan biriga aylanib bormoqda. Nufuzli xalqaro tadbirimizning aynan bu azim shaharda tashkil etilayotgani ham fikrimizni yaqqol tasdiqlaydi.

Xush kelibsiz ko‘hna va hamisha navqiron Samarqandga, aziz mehmonlar!

Hurmatli anjuman ishtirokchilari!
Ma‘lumki, turizm sohasi jahon iqtisodiyotining eng tez rivojlanayotgan va istiqbolli tarmoqlaridan biri hisoblanadi. Globallashuv jarayonlari insonlarning dunyo bo‘ylab erkin harakatlanishiga keng imkoniyatlar eshigini ochdi.

Butunjahon turizm kengashi ma‘lumotlariga ko‘ra, koronavirus pandemiyasidan avval jahon yalpi mahsulotining taxminan 10 foizi, eksportining esa 7 foizi sayyohlik sektoriga to‘g‘ri kelgan.

Afsuski, pandemiya ushbu tarmoqqa jiddiy zarba berdi. Natijada turizm eksporti daromadlari sezilarli darajada qisqardi, millionlab ish o‘rinlari yo‘qotildi.

Butunjahon turizm tashkiloti va sizlar vakillari bo‘lgan davlatlar hukumatlari tomonidan olib borilgan tizimli ishlar natijasida bugungi kunda global turizm qayta oyoqqa turmoqda. Barcha mamlakatlarning birgalikdagi harakatlari va yaqin hamkorligi tufayli ushbu tarmoq yangi muammo va tahdidlar qarshisida o‘zining moslashuvchan va barqarorligini namoyish etmoqda.

O‘tgan yili dunyo miqyosida salkam bir milliard turist xorijga sayohat qildi. Bu pandemiyaga qadar bo‘lgan ko‘rsatkichning

salkam 70 foizini tashkil etdi. Joriy yilda ushbu raqam yanada o‘shishi kutilmoqda.

Ko‘plab davlatlar hozirgi murakkab vaziyatda o‘z iqtisodiyotini tiklash va dolzarb ijtimoiy muammolarni hal etishda turizm sohasiga tayanmoqda. Global raqobat muhiti kuchaymoqda. Bu albatta bejiz emas: sohaga kiritilayotgan har bir dollar kelgusida 3-4 barobar daromad keltirishini barchangiz yaxshi bilasiz. Yaratilayotgan har bir yangi ish o‘rni esa boshqa tarmoqlarda yana 2 ta ish joyini hosil qilishga imkon beradi.

Shu ma‘noda, turizm mamlakatlari-mizning umumiy farovonligi va barqaror taraqqiyotini ta‘minlashning muhim omilidir, desak, mubolag‘a bo‘lmaydi. Ayni paytda, u jahon xalqlari o‘rtasida madaniy almashuvlarni kuchaytiradigan, bag‘rikenglik tamoyillarini mustahkamlaydigan qudratli vositadir.

Hurmatli forum qatnashchilari!

Biz Tashkilotimizning turizmni dunyoning barcha mintaqalarida jadal rivojlantirish va uni jahon iqtisodiyoti drayverlaridan biriga aylantirish yo‘lidagi faol sa‘y-harakatlarini to‘liq qo‘llab-quvvatlaymiz. Uning sohadagi yangicha yondashuvlari, xizmatlar sifatini keskin oshirish bo‘yicha aniq chora-tadbirlari hamda infratuzilma loyihalariga katta urg‘u berayotgani tahsinga sazovordir.

Ayniqsa, Tashkilotning global kun tartibida turizmning asosiy o‘rin egalashi, ta‘lim salohiyatini yuksaltirish, kambag‘allikni qisqartirishda sayyohlik sohasi ulushini oshirish, ko‘p tomonlama sheriklik aloqalarini kuchaytirishga qaratilgan intilishlari barchamizning mushtarak maqsadlarimiz bilan uyg‘undir.

Ta‘kidlash joizki, so‘nggi yillarda Butunjahon turizm tashkiloti Yangi

O‘zbekistonning sayyohlik salohiyatini to‘liq ro‘yobga chiqarishda ishonchli va uzoq muddatli strategik hamkoriga aylandi.

O‘tgan davrda mamlakatimiz uchun xavfsiz turizm bo‘yicha qo‘shma chora-tadbirlar ishlab chiqildi, startap loyihalari amalga oshirilmoqda. Shaharlarimizda Tashkilotning mintaqaviy anjumanlari o‘tkazib kelinmoqda.

Yaxshi xabardorsizlar, biz so‘nggi yillarda O‘zbekistonda keng ko‘lamli, ortga qaytmas tus olgan islohotlar dasturini amalga oshiryapmiz. Unda asosiy e‘tiborni demokratik jamiyat institutlarini mustahkamlash, iqtisodiyotni liberallashtirish, xalqimizning turmush darajasini yuksaltirishga qaratmoqdami.

Davomi 2-betda

O‘ZBEKISTON PREZIDENTI PEKINGA KELDI

Xitoy Xalq Respublikasi Raisi Si Szipinning taklifiga binoan O‘zbekiston Respublikasi Prezidenti Shavkat Mirziyoyev rafiqasi bilan birga amaliy tashrif bilan Pekin shahriga keldi.

“Shoudu” xalqaro aeroportida davlatimiz rahbarini XXR favqulodda vaziyatlar vaziri Van Syansi va boshqa rasmiy shaxslar kutib oldi.

Oliy martabali mehmonlar sharafiga ikki mamlakat davlat bayroqlari ko‘tarildi, faxriy qorovul saf tordir.

Tashrif doirasida 17-18-oktabr kunlari davlatimiz rahbari XXR Raisi Si Szipin va Xitoy Xalq siyosiy maslahat kengashi raisi

Van Xunin bilan muzokaralar, boshqa ikki tomonlama uchrashuvlar o‘tkazishi rejalashtirilgan.

O‘zbekiston yetakchisi “Bir makon, bir yo‘l” xalqaro forumining ochilishida ishtirok etadi va yalpi sessiyasida nutq so‘zlaydi.

O‘ZA

BIZ VA DUNYO

BUYUK IPAK YO‘LI AN‘ANALARINI TIKLASHGA
QO‘SHILGAN ULKAN HISSA

O‘zbekiston Prezidenti Shavkat Mirziyoyev 17-18-oktabr kunlari Pekinda bo‘lib o‘tadigan “Bir makon, bir yo‘l” 3-xalqaro forumi tadbirlarida ishtirok etadi.

Forum “Umumiy rivojlanish va farovonlikka erishish uchun “Bir makon, bir yo‘l” doirasida yuqori sifatli hamkorlik” mavzusiga bag‘ishlangan. Unda savdo-iqtisodiy hamkorlikni rivojlantirish, o‘zaro bog‘liqlikni chuqurlashtirish, “yashil” Ipak yo‘lini birgalikda qurish, raqamlashtirish dasturini ilgari surish va iqtisodiy

o‘shirishning yangi drayverlari, to‘siqsiz savdo, xalqlar o‘rtasidagi aloqalar, tahlil markazlari, mintaqaviy masalalarda o‘zaro hamkorlik muhokama qilinadi.

Davomi 3-betda

YANGI O‘ZBEKISTON —
YASHIL MAKONDA BIRGA YASHAYLIK!
O‘zbekiston mahalla faollari, nuroniylar, ziyolilar,
xotin-qizlar va yoshlar vakillarining xalqimizga
MUROJAATI

Aziz vatandoshlar!

Ma‘lumki, Yer sayyorasi — bashariyatning yagona Vatani. Yer — hayot manbai. Inson hayoti uchun nimaiki zarur bo‘lsa, barchasini bizga mana shu saxovatli zamin in‘om etadi. Afsuski, bugun sudvan, tuproqdan noto‘g‘ri foydalanish, ekologik jihatdan zararli texnologiyalarni qo‘llash oqibatida sayyora-mizda iqlim o‘zgarib, bioxilma-xillik yo‘qolib bormoqda. Yer yuzidagi 8 milliarddan ortiq insoniyatning hayoti xavf ostida qolmoqda.

Prezidentimiz Shavkat Mirziyoyev yaqinda BMT minbaridan insoniyat hayotiga tahdid solayotgan uchta inqiroz — iqlim o‘zgarishi, bioxilma-xillik yo‘qolishi va atrof-muhit ifloslanishini bartaraf etishga doir muhim tashabbuslarni ilgari surdi.

Davomi 3-betda



